

LISTOVI...

GRAČANIČKI GLASNIK
časopis za kulturnu historijuBroj 60
Godina XXX
Novembar, 2025.
[str. 295-318]

© Monos 2025

LISTOVI...

Listovi gračaničkog kalendara od 11. 5. do 1. 11. 2025.

Prof.dr. Omer Hamzić**11. 5. 2025.*****Završen je 26. Festival dječjeg teatra BiH u Gračanici***

Od 9. do 11. maja 2025. godine, Bosanski kulturni centar Gračanica bio je domaćin 26. festivala dječjeg teatra BiH. I ove godine Festival je okupio brojne osnovne škole i dramske grupe iz cijele zemlje koje su u svojim nastupima predstavile kreativne i nadahnute izvedbe. Publika je uživala u bogatom teatarskom programu, a stručni žiri u sastavu: Merima Baraković, producent, Mersiha Jogunčić, profesorica filozofije i sociologije i Nedžad Peljto, direktor BKC, dodijelio je sljedeće nagrade i priznanja: Nagradu za najbolju predstavu u cjelini, ravnopravno dijele Prva osnovna škola Srebrenik za predstavu "Mali princ" (Rediteljice: Kimeta Buševac i Edisa Muratović) i KŠC "Sv. Josip" Sarajevo – "Pale sam na svijetu" (Autor: Jens Sigsgaard, adaptacija: Ana Dolić; *Nagrada za umjetničko-pedagoško vodstvo*: Albina Sumbić (predstava: "Prva ljubav", autor: Majda Tomić, Izvođač: OŠ "Hasan Kikić" Gračanica); *Nagrada za autentični umjetničko-teatarski izraz u igri*: Mostarski teatar mladih (Predstava: "Naš mali princ", autor: Antoine de Saint-Exupéry, režija: Sead Đulić); *Nagrada za radost igre*: Dramska grupa "Sedma" – Sedma osnovna škola Blažuj – Ilidža (Predstava: "Sedam Snježana i patuljak" autor: Tode Nikoletić, adaptacija: Hajrudin Neradin); *Nagrada za kostimografiju*: predstava

“Krunidba” (Izvođač: OŠ fra Mije Čujića, Bukovica – Tomislavgrad, režija: Ivana Buntić; *Nagrada za ansambl igre*: OŠ “Sv. Franjo” Tuzla, predstava: “Kraljevska zbrka i dražesna princeza” (po motivima bajke o Sigismundi i Krpimiru, autorica: Sanja Lovrenčić, režija: Marica Lazić). Kako je saopštio žiri, ovogodišnji festival još jednom je potvrdio da dječiji teatar ima neprocjenjivu vrijednost u razvoju mašte, samopouzdanja i timskog duha kod djece. Čestitamo svim učesnicima i dobitnicima nagrada! *Izvor: BKC Gračanica.*

13. 5. 2025.

Manifestacija Dani Gračanice 2025 otvorena svečano, s više od 30 događaja

Manifestaciju je na centralnom trgu Gračanice svečano otvorio gradonačelnik Sadmir Džebo, naglasivši važnost kontinuiteta i zajedništva kroz kulturu, obrazovanje, sport i lokalni razvoj. U programu otvaranja nastupila su djeca iz JU “Naša djeca”, učenici muzičke škole te lokalna kulturno-umjetnička društva. Tokom trajanja manifestacije, od 13. maja do 2. juna, planirano je više od 30 sadržaja: od izložbi, koncerata, sportskih turnira, promocija knjiga i radionica do obilježavanja važnih datuma. Posebno su istaknuta dva dana: 25. maj – Dan odbrane Gračanice, i 2. juni – Dan grada Gračanice, koji će biti obilježeni višesatnim programima.

Izvor: Radio Gračanica / gracanica.gov.ba.

15. 5. 2025.

Obilježen 15. maj, Dan civilnih žrtava rata u Gračanici

Ovogodišnjem obilježavanju kod spomenika na Bijelim poljima, uz ostale građane, potomke civilnih žrtava rata, prisustvovao je i Adem Mustajbašić, koji je dobio ime po svom djedu Ademu Mustajbašiću, službeno prvoj civilnoj žrtvi rata na području Gračanice. Uz ostalo, izjavio je da nosi to ime s ponosom i da mu je važno da se djed, ali i ostale žrtve nikada ne zaborave. Nakon polaganja cvijeća na spomenik, prisutnima su se obratili gradonačelnik Gračanice Sadmir Džebo i u ime Islamske zajednice imam Hamdija ef. Islamović. Poručili su da se mir mora čuvati, ali i da se prošlost ne smije zaboraviti. Spomenuta je, uz ostalo i brojka od 150 ubijenih civila, kojima je odata počast i poštovanje. Niko nije ni spomenuo da za te žrtve još uvijek niko, ni nakon 30 godina od rata, ne samo da nije odgovarao pred sudom, već niko nije ni prijavljen. Po svemu sudeći tako će i ostati i umjesto pravde za ubijene civile, mi ćemo gajiti tzv. kulturu sjećanja, vjerujući uzalud u “tranzicijsku pravdu”

Izvor: Radio Gračanica.

21. 5. 2025.

Svečani koncert Kamernog simfonijskog orkestra Zenica — Praizvedba “Fantazije za orkestar” gračaničkog kompozitora Miralema Mejremića

Koncert je održan pod pod dirigentskom palicom maestra Munira Mešanovića, dok je specijalni gost večeri bio istaknuti pijanista Bartolomej Stanković. Na programu su bila i djela kompozitora Bizeta, Straussa, Komzaka, Jusića, Huljića i Bareta, koja je simfonijski orkestar izveo pod dirigentskim vodstvom dvije cijenjene dirigentice Tanise Cikotić i Amne Husejnagić. *Izvor: Program koncerta / BKC Gračanica.*

25. 5. 2025.

I ove godine svečano obilježen Dan odbrane Gračanice

Prvo je u petak, 23. maja tim povodom upriličena već tradicionalna memorijalna šetnja na Zečev gaj, lokalitet na kojem su život za Bosnu i Hercegovinu, 25. 5. 1992. godine položila deseterica boraca Teritorijalne odbrane. Tim povodom je predstavljeno i idejno rješenje za izgradnju Spomen parka Zečev gaj. Svečanom programu, 25. 5., prethodilo je polaganje cvijeća na Centralno spomen obilježje odbranbeno oslobodilačkog rata 1992. – 1995. godina, te Počasna biciklistička vožnja u organizaciji MTB “Trebava” trasom Gračanica – Zečev gaj – Vis. Prisutnim na akade-

miji prvo se obratio Sadržmir Džebo, gradonačelnik Grada Gračanice, a potom je prigodan čas historije održao Hazim Vikalo, predsjednik Opštine i Ratnog predsjedništva opštine Gračanica, koji je u tim sudbonosnim danima bio na čelu civilnog rukovodstva i vojne komande Gračanice (u periodu 1992. – 1995.). U kulturno-umjetničkom dijelu akademije prigodan recital izveo je poznati glumac iz Tuzle Irfan Kasumović, a nastupili su i učenici Muzičke škole Gračanica. Nakon akademije, položeno je cvijeće na više spomen obilježja u gradu: na šehidsko mezarje Šabuša, na spomenik gračaničkoj mladosti Mensuru i Havi te na mezarja Elme Brguljak, Armina Šišić i Nihada Šišić – ubijene gračaničke mladosti na tuzlanskoj kapiji. *Izvor: Radio Gračanica.*

26. 5. 2025.

Održana centralna smotra folklora u Gračanicima

Smotra je okupila kulturno-umjetnička društva s područja cijelog grada. Nakon defilea učesnika od Sahat kule u centru grada do Rukometnog igrališta, posjetioci su u tom prostoru imali priliku uživati u bogatom programu pjesme i igre iz bosanskohercegovačke tradicije, koji je oduševio sve prisutne. Na manifestaciji su nastupile folklorne skupine iz više kulturno-umjetničkih sruštava (KUD) i udruženja: KUD “Adem Alić” Gračanica, KUD “Sloga”

Miričina, KUD "Lukavica" Lukavica, UG "Jošak" Piskavica, UG "Izvor" Škahovica, UG "Bosna Art" Stjepan Polje, UG "Sijedi Krš" Babići, KUD "Podmonjski behar" Doborovci, KUD "Mladost" Malešići, KUD "Ljiljan" Prijeko Brdo i KUD "Gradina" Soko. *Izvor: organizatori smotre.*

30. 5. 2025.

Održana 8. sjednica Gradskog vijeća Gračanice: donesene odluke iz oblasti lokalne samouprave, komunalne infrastrukture i poljoprivrede

Vijećnici su donijeli i Odluku o dodjeli priznanja Grada Gračanica za 2025. godinu, koja će tradicionalno biti uručena povodom obilježavanja Dana grada. Usvojena je i Odluka o zonama sanitarne zaštite i zaštitnim mjerama za izvorište "Bunar SPB-2" u Stjepan Polju, čime se dodatno jača sistem zaštite gradskih vodoizvorišta. Na sjednici su razmatrane i personalne promjene u nekoliko vijeća mjesnih zajednica (Lendići, Miričina, Donja Orahovica), a Vijeće je dalo saglasnost i na nove statute mjesnih zajednica Stjepan Polje i Piskavica, čime je nastavljen proces pravnog i organizacionog uređenja lokalne samouprave. Usvojen je i Izvještaj o provedenim podsticajnim mjerama u poljoprivredi za 2024. godinu, kojim su potvrđeni pozitivni efekti ulaganja u proizvodnju mlijeka, plastičnu i voćarsku proizvodnju. Također, Vijeće je razmotrilo i usvo-

jilo Izvještaj o radu Gradskog pravo-branilaštva za 2024. godinu. Sjednica je protekla u radnoj atmosferi, uz konstataciju da su realizovane aktivnosti u skladu s planom i da gradske službe nastavljaju s pripremama za ljetni period i implementaciju razvojnih projekata. *Izvor: Grad Gračanica*

1. 6. 2025.

Treći planinarski susreti "Gračaničkim stazama"

Manifestacija je okupila veliki broj učesnika iz cijele Bosne i Hercegovine, među kojima su bili planinari, rekreativci, ljubitelji prirode i lokalni građani. Planinarsko-pješački pohod izveden je na dvije staze: Prva: Monj – Cerovi – Vis (srednje teška staza); druga: Vis – Ravne-Vis (lakša staza). Učesnici su se okupili ispred Centralnog spomen-obilježja Odbrambeno-oslobodilačkog rata, gdje su položili cvijeće i odali počast poginulim borcima, a potom su se zaputili ka svojim polaznim tačkama. Na odredištima ih je dočekaio zajednički planinarski ručak i druženje. Organizatori su istakli da je cilj susreta promicanje zdravih životnih navika, očuvanje prirode i afirmacija gračaničkih prirodnih ljepota. *Izvor: PD "Zefir" Gračanica.*

2. 6. 2025.

Dan grada Gračanica obilježen nizom kulturnih, obrazovnih i protokolarnih događaja

Centralna svečanost održana je u Bosanskom kulturnom centru uz prisustvo brojnih zvanica, predstavnika javnog, političkog, kulturnog i privrednog života. Svečanosti su prethodili polaganje cvijeća na spomen-obilježja u centru grada, vjerski obredi i prigodan kulturni program. Na svečanoj akademiji uručena su tradicionalna godišnja priznanja Grada Gračanica: – *Zlatna plaketa Grada Gračanica* dodijeljena je firmi “Sagra” i Udruženju pčelara “Bagremovac”; *Zlatna značka Grada Gračanica*: Hamdija Jukan i Senada Zaketović; – *Počasni građani Grada Gračanica*: Ermina Hot i Sabrija Nukić. U kulturnom dijelu programa na akademiji su nastupili ženski hor “Arabeske” i učenici Muzičke škole Gračanica. Izvor: Radio Gračanica.

11. 6. 2025.

Promocija 59. broja “Gračaničkog glasnika – u znaku poezije pjesnikinje za djecu Lejle Kadić.

Prije nego što je predstavio sadržaj ovog broja, glavni urednik Časopisa Omer Hamzić podsjetio je prisutne na dvije okrugle godišnjice koje “padaju” u ovu, 2025. godinu, a koje bi možda mogle poslužiti kao poticaj za neke nove teme i promišljanja. Prva se tiče ovog časopisa i njegovih

30 godina neprekidnog izlaženja (u pripremi je već sljedeći, jubilarni 60. broj), a druga je vezana za pojavu prve knjige o Gračanici, tačno prije 40 godina. Riječ je o knjizi “Biljezi slobode” o spomeničkom naslijeđu iz Drugog svjetskog rata (autori: Ešref Ćurić i Omer Hamzić). “Ove dvije okrugle godišnjice imaju veze jedna s drugom i po, mome sudu, od značaja su za kulturnu historiju ovoga grada. Tek poslije njih počinju ozbiljnija historijska istraživanja Gračanice i pojavljuju se nove knjige i autori”, rekao je Hamzić. Nakon predstavljanja ovog broja, mr.sc. Fatima Bećarević Softić govorila je o pjesništvu gračaničke poetese za djecu Lejle Kadić, autorice nekoliko knjiga i specifičnog stilskog izraza, namijenjenih najmlađem uzrastu. Uz prezentaciju svojih knjiga i recitovanje stihova pjesnikinja je izvela i mali performans na improvizovanoj sceni sa djevojčicom, koja je plesala i pjevala njene uglazbljene stihove. Po ocjeni publike, bilo je ovo malo osvježenje nakon “teških” tema na promocijama prethodnih nekoliko brojeva ovog časopisa. Naravno, mogla su se čuti i suprotna gledišta. Da napomenemo: sa ovim brojem časopis ulazi u tridesetu godinu izlaženja i neprekidnog rada.

11. 6. 2025.

Hamdija ef. Islamović novi glavni imam Medžlisa Islamske zajednice Gračanica

Izabran je umjesto Smaje ef. Mustafića (rođen 1959. godine u Babićima), koji je tu funkciju obavljao od 2007. godine do odlaska u penziju, ove godine. Dekret Reisul-uleme novom glavnom imamu Medžlisa IZ Gračanica Hamdiji-ef. Islamoviću uručio je muftija Fazlović, te mu poželio uspjeh u radu. Hamdija-ef. Islamović je rođen 1991. godine. Završio je Behram-begovu medresu u Tuzli i Fakultet za šerijatsko i svjetovno pravo na Univerzitetu Al-Azhar u Kairu. Bio je predsjednik Udruženja studenata Bosne i Hercegovine u Egiptu, učestvovao je u izdavanju časopisa "Sawtul-Busna vel-Hersek" te je predstavljao našu zemlju na nekoliko međunarodnih simpozija i seminara. Od 2015. godine je imam, hatib i muallim u Medžlisu Gračanica, prvo u džematu Golaći, a potom u džematu Šarena džamija. Student je postdiplomskog studija na Fakultetu islamskih nauka u Sarajevu. Govori arapski i engleski jezik. Oženjen je i otac dvoje djece. (Izvor: muftijstvotz.ba)

14. 6. 2025.

Otvoren "MAK centar za gradnju" – nova investicija kompanije "Širbegović"



U Poslovnoj zoni Stjepan Polje, uz magistralni put Tuzla–Doboj, otvoren je "MAK centar za gradnju", nova investicija proizašla iz poslovnog sistema kompanije "Širbegović". Riječ je o savremeno opremljenom objektu površine 3.500 kvadratnih metara, izgrađenom u rekordnom roku od četiri mjeseca. Centar nudi širok asortiman građevinskog materijala, alata, mašina i prateće opreme za uređenje doma, okućnice i vrtova, te zapošljava 50 radnika, među kojima i sedam povratnika iz inostranstva. Vlasnica centra Nerma Širbegović Delić istaknula je da je objekat izgrađen prema principima energetske efikasnosti i ekološke održivosti, s ugrađenom solarnom elektranom i sistemom za korištenje podzemnih voda za toplotne pumpe. Otvaranjem ovog objekta, dodala je, započeta je prva faza budućeg retail parka na površini od 70.000 kvadratnih metara, koji će dugoročno donijeti nova radna mjesta i dodatni razvoj zone. Na svečanosti su se obratili predstavnici lokalne i entitetske vlasti, koji su istakli važnost ulaganja doma-

ćih kompanija u zapošljavanje i modernizaciju proizvodnih kapaciteta. Otvaranje "MAK centra" u Gračanici još jednom je potvrdilo poduzetnički duh lokalne sredine i kontinuitet razvoja jedne od najuspješnijih bosanskohercegovačkih građevinskih grupacija – "Širbegović", čije novo poglavlje vodi mlada generacija menadžera. *Izvor: Avaz*

14. 6. 2025.

Naučni skup "Zavičajna istraživanja sjeveroistočne Bosne"

Održan je u povodu 50. godišnjice istraživačkog rada svog nekadašnjeg uposlenika, sada penzionera mr. sc. Rusmira Djedovića u organizaciji Zavoda za zaštitu i korištenje kulturno-historijskog i prirodnog naslijeđa Tuzlanskog kantona, odakle je Djedović ispraćen u penziju. Počeci naučnog interesovanja i istraživačkog rada Rusmira Djedovića, vremenski se poklapaju sa prvim istraživanjima i objavljenim knjigama o prošlosti Gračanice, na kojima su radili drugi autori od 1985. do 1991. godine (Omer Hamzić, Osman Delić, Salih Kulenović). Sa njima je aktivno sarađivao da bi u kasnijem periodu poduzimao samostalna istraživanja, objavljuvao radove i knjige, kako samostalno, tako i u koautorstvu sa drugim. Zajedno sa Omerom Hamzićem, učestvovao je, između ostalog u iniciranju i osnivanju Časopisa za kulturnu historiju

"Gračanički glasnik" (1996.) koji mu je poslužio kao platforma za dalju afirmaciju i napredovanje. Svoje referate predstavilo je tridesetak stručnih i naučnih radnika iz Tuzle, Sarajeva, Gračanice i još nekoliko drugih gradova i institucija u Bosni i Hercegovini koji će biti, kako je najavljeno, objavljeni u posebnom zborniku do kraja ove godine.

23. 6. 2025.

Završen programski ciklus "Dani Gračanice 2025" – više od 40 događaja

Manifestacija "Dani Gračanice 2025" uspješno je završena bogatim i sadržajnim programom, u kojem su dominirali događaji za djecu, učenike i mlade. Tokom pet sedmica održani su brojni kulturni, sportski i edukativni programi: izložbe, promocije knjiga, smotre folklora, planinarski i biciklistički pohodi, koncerti i školske priredbe. Gradonačelnik Sadržaj Džebo u završnom obraćanju zahvalio je organizatorima, školama, udruženjima i građanima na učešću i dodao da "Dani Gračanice" potvrđuju vitalnost i kreativnost lokalne zajednice. Ove godine manifestacija je zabilježila najveći broj događaja u posljednjoj deceniji. *Izvor: gracanica.gov.ba.*

2. 7. 2025.

**Održana 9. redovna sjednica
Gradskog vijeća Gračanica.
Dugoročno kreditno zaduženje
Grada**

Ovu sjednicu obilježio je enrmno dugačak dnevni red od čak 22 tačke. Razmatrano je niz važnih pitanja iz oblasti finansija, komunalnih usluga, urbanizma i lokalne samouprave. Najvažnije tačke odnosile su se na: dugoročno kreditno zaduženje Grada; rebalans budžeta, koji je zao-kružen na 33.289.287 KM; Najvažnija tačka dnevnog reda bila je Odluka o izmjenama i dopunama Odluke o dugoročnom kreditnom zaduženju Grada Gračanica. Tom odlukom izvršeno je preusmjeravanje kreditnih sredstava u iznosu od 180.000 KM s ranije planiranog projekta kupovine zemljišta za sajmište – čija realizacija nije bila moguća zbog izostanka ponuda na javnom pozivu – na projekat izgradnje mosta kod Etivaže, u ulici Gračaničkih gazija. Kako je obrazloženo, postojeći most je uske širine i dotrajavao, što uz povećan intenzitet saobraćaja stvara česte zastoje, naročito nakon izmještanja autobuske stanice i izgradnje novih stambenih objekata u blizini. Izgradnjom novog mosta, čija ukupna vrijednost iznosi 540.000 KM, uz kreditna sredstva biće angažovano i 360.000 KM iz budžeta Grada. Projekat bi trebao značajno poboljšati protočnost saobraćaja i sigurnost u urbanom dijelu Gračanice. Vijeće je usvojilo

i Izmjene i dopune Budžeta Grada Gračanica za 2025. godinu, te Odluku o izvršavanju budžeta, kao i više odluka o personalnim promjenama u mjesnim zajednicama i stalnim radnim tijelima. Donesena je i Odluka o stručnom osposobljavanju nezaposlenih visokoobrazovanih osoba, koja predviđa njihov angažman u javnom i privatnom sektoru s ciljem sticanja prvog radnog iskustva. Usvojeni su i izvještaji o radu i finansijskom poslovanju javnih preduzeća “Veterinarska stanica”, “Vodovod i kanalizacija” i “Komus” za 2024. godinu, kao i Izvještaj o realizaciji kapitalnih projekata u okviru Programa investicija 2021–2025. Sjednica je zaključena preporukama da se, uz planiranu izgradnju mosta, intenzivira i priprema nove projektne dokumentacije za buduće **uređenje prostora sajmišta**, uz ponovni pokušaj pribavljanja grant sredstava. *Izvor: Grad*

11. 7. 2025.

**I Gračanica obilježila 30.
godišnjicu genocida u Srebrenici**

Program obilježavanja počeo je komemorativnom šetnjom od Sahatkule do Parka žrtava genocida, simbolično u 11:07 sati, u organizaciji Gradske uprave i udruženja “Gračaničko keranje”. U Parku žrtava genocida formiran je “ljudski cvijet sjećanja”, a učesnici su položili bijele ruže i proučili Fatihu. Istog dana u BKC-u Gračanica otvorena je dokumentarna izložba “Srebrenica me-

mento", autora prof. Edina Šakovića, te održan komemorativni program u organizaciji Bošnjačke zajednice kulture "Preporod" – Gračanica. *Izvor: Radio Gračanica*

15. 7. 2025.

Arheolog dr. Adnan Kaljanac posjetio Stari grad Soko

Na poziv Turističke zajednice Grada Gračanica, arheolog dr. Adnan Kaljanac sa Filozofskog fakulteta u Sarajevu, u pratnji prof. dr. Jesenka Hadžihasanovića, obišao je lokalitet Starog grada Soko. Tokom obilaska istaknuta je potreba sistematskog arheološkog istraživanja ovog lokaliteta, koji je jedan od najznačajnijih spomenika srednjovjekovnog naslijeđa na području sjeveroistočne Bosne. Na sastanku održanom u MZ Soko razgovaralo se o budućoj konzervaciji, arheološkim iskopavanjima, planiranju pristupnih puteva s ciljem da "Sokolska gradina" postane dio turističke ponude Gračanice. Dr. Kaljanac je izrazio spremnost da se formira stručni tim koji bi vodio istraživanja u saradnji s gradskim vlastima i Zavodom za zaštitu spomenika. *Izvor: Tur.zaj. Gračanica / MZ Soko.*

19. 7. 2025.

Prvi međunarodni oldtajmer skup u Gračanici

U okviru manifestacije "Ljetne večeri pod lipama", na gradskim ulicama i trgu ispred BKC-a održan je Prvi međunarodni oldtajmer skup u Gračanici. Manifestacija je okupila oko 100 učesnika iz Bosne i Hercegovine, Hrvatske, Srbije i Italije. Skup je otvorio predsjednik OTK Gračanica Damir Ibrahimović, a prisutne je pozdravio i predsjedavajući Gradskog vijeća Mirza Okić. Nakon izložbe starih automobila, uslijedila je svečana defile vožnja kroz centar grada. U kulturnom dijelu programa nastupili su KUD "Adem Alić" i vokalni sastav VIS "Sijedi krš" Babići. Organizatori su izrazili zadovoljstvo odzivom i najavili da će skup postati tradicionalna manifestacija kojom će se promovirati ljubav prema tehničkoj kulturi i očuvanju automobilskeg naslijeđa. *Izvor: Radio Gračanica.*

25. 7. 2025.

Nihad Krajnović izabran za novog predsjednika GO SDP Gračanica

Na izvještajno-izornoj konferenciji Gradskog odbora SDP Gračanica, većinom glasova delegata za predsjednika je izabran Nihad Krajnović. Od ukupno 79 prisutnih delegata, Krajnović je dobio 49 glasova, dok je njegov protukandidat Vahidin Smajlović osvojio 30 glasova. Na konferenciji su usvojeni izvještaji o radu, a izabran je i novi Nadzorni

odbor u sastavu: Senad Memić, Dženita Dugić, Adnan Salihbašić, Sead Gazibegović i Ervin Baraković. Ne zna se da li je bilo riječi o uzrocima i posljedicama katastrofalnog poraza stranke nakon punih 25 godina suverene vladavine u Gračanici i da li je neko za to odgovoran. Barem javno nije saopšteno. *Izvor: GO SDP Gračanica.*

4. 8. 2025.

Završna manifestacija “Dani romske kulture i tradicije”

Povodom Aliđuna i obilježavanju međunarodnog Dana sjećanja na stradanje Roma u Drugom svjetskom ratu, u velikoj sali Bosanskog kulturnog centra Gračanica održana je završna manifestacija “Dani romske kulture i tradicije”. Manifestaciji su prisustvovali brojni gosti, predstavnici Gradske uprave, javnih ustanova i organizacija civilnog društva. Pozdravni govor održao je predsjednik Udruženja Roma Gračanica Enes Muratović naglasivši da manifestacija ima za cilj očuvanje romske tradicije i kulture, kao i promociju zajedništva i tolerancije u lokalnoj zajednici. U ime Ministarstva za ljudska prava i izbjeglice BiH skupu se obratio i ministar Sevlid Hurić. Uručene su zahvalnice pojedincima i organizacijama koje podržavaju aktivnosti Roma u oblasti obrazovanja, zapošljavanja i kulturne afirmacije. Program su upotrijebili nastupi KUD-

ova i muzičkih izvođača iz više gradova. *Izvor: Radio Gračanica.*

7. 8. 2025.

Održan okrugli sto o Nacrtu Prostornog plana Tuzlanskog kantona 2025–2045

Organizatori skupa su bili su Ministarstvo prostornog uređenja i zaštite okolice TK i IPSA Institut Sarajevo, čiji su stručnjaci i prezentirali taj strateški plan kao njegovi autori. U središtu diskusije bili su glavni strateški ciljevi prostornog razvoja: infrastrukturna mreža, saobraćajni pravci, prostorno planiranje u funkciji održivog razvoja, zaštita prostora i razvoj sportsko-rekreativnih zona. Posebna pažnja posvećena je razvoju planskih dokumenata na nivou lokalnih zajednica. Okruglom stolu prisustvovali su predstavnici Gradske uprave, Službe za prostorno uređenje, vijećnici, direktori javnih preduzeća i mediji. Najavljena je i tematska sjednica Gradskog vijeća o istom pitanju za 13. august. *Izvor: GU Gračanica / IPSA Institut.*

7. 8. 2025.

Svečano obilježen 7. august, Dan pobjede na Visu

Programu obilježavanja godišnjice bitke na Visu, koji se održao ispred spomen-obilježja na kome su ispisana imena 61 poginulog borca prisustvovala su porodice poginulih boraca, borci, branitelji Bosne i Hercegovine, predstavnici zako-

nodavne vlasti, ratni komandanti, predstavnici i članovi boračkih udruženja sa područja Grada Gračanica, imami Medžlisa Islamske zajednice Gračanica te građani. Nakon polaganja cvijeća na spomen-obilježje, prigodne govore održali su gradonačelnik Grada Gračanice Sadržmir Džebo, komandant Osman Puškar te u ime MIZ Gračanica, Abdulah ef. – Husić, imam Bijele džamije. Kako su istakli govornici, bila je to jedna u nizu bitaka koje je Armija RBiH vodila u tom vremenu, pretvarajući 1994-tu godinu u godinu ratne prekretnice. Ali, uz samo oslobođanje Visa – ogroman značaj je imala i njego-va kasnija odbrana.

13. 8. 2025.

Tematska sjednica Gradskog vijeća Gračanica: razmatranje Nacrta Prostornog plana TK 2025–2045

Kako je i najavljeno, sjednica je imala za cilj sagledavanje utjecaja planiranih rješenja u tom veoma važnom dokumentu na prostor Gračanice, s posebnim osvrtom na infrastrukturni razvoj, industrijske zone, zaštitu prirodnih resursa i ravnomjerni prostorni razvoj. Tokom rasprave vijećnici su istakli potrebu da se kroz buduće planove kantonalnog nivoa uvažavaju lokalne razvojne specifičnosti, prije svega vezane za daljnje širenje Poslovne zone Stjepan Polje, modernizaciju putne infrastrukture, izgradnju zaobilaznice

grada i očuvanje poljoprivrednog zemljišta. Zajednički je ocijenjeno da Gračanica raspolaže značajnim razvojnim potencijalima, ali da oni zahtijevaju bolju koordinaciju prostornog planiranja između kantonalnog i lokalnog nivoa, uz veće učešće građana i privrede u javnim raspravama. Tematska sjednica zaključena je prijedlogom da se Grad Gračanica aktivnije uključi u izradu konačne verzije Prostornog plana TK i da nadležne službe pripreme precizne prijedloge izmjena i dopuna. *Izvor: Grad Gračanica*

15. 8. 2025.

Otvoren “Gračanica Summer Fest 2025” – muzika, film i književnost pod otvorenim nebom

Na platou ispred BKC-a Gračanica otvoren je festival “Gračanica Summer Fest 2025”, koji će trajati od 15. do 21. augusta pod motom “Ljeto traje duže kada imaš priču”. Festival obuhvata bogat program: večernje koncerte, filmske projekcije, književne promocije, dječije radionice i razgovore s umjetnicima. Na otvaranju su nastupili bendovi “After Dark” i “Rok ko fol”, a tokom sedmice publika će moći uživati u kombinaciji kulturnih i zabavnih sadržaja. Organizatori su Bosanski kulturni centar Gračanica i Gradska uprava, uz podršku lokalnih sponzora i udruženja. Festival je koncipiran kao spoj urbane kulture, književnosti i muzike, te je već prvog dana privukao

brojnu publiku. *Izvor: BKC Gračanica / GU Gračanica.*

20. 8. 2025.

***Predstavljena publikacija
"Sam naš opstanak je naša
pobjeda: odabrani citati Alije
Izetbegovića"***

Ovu neveliku publikaciju priredili su prof. dr. Omer Hamzić i mr. Edin Šaković, koristeći se tekstovima iz specijalnog priloga povodom desete godišnjice smrti Alije Izetbegovića, koji je objavljen 2013. u 36. broju "Gračaničkog glasnika". Publikacija je kao i njena promocija zamišljena kao prilog obilježavanju stote godišnjice rođenja prvog predsjednika Predsjedništva nezavisne Bosne i Hercegovine (1925–2003). Kako je rečeno na promociji, u koncipiranju sadržaja te knjižice izvršen je izbor Izetbegovićevih misli o slobodi, državi, vjeri i čovjeku. To je ujedno i podsjećanje na duhovnu i moralnu dimenziju njegove političke ostavštine. Na promociji, koja je održana u prepunoj ders-hani Osman-kapetanove medrese u Gračanici govorili su priređivači Omer Hamzić i Edin Šaković, te jedan od recenzenata Ibrahim Nurkić, ukazavši na aktuelnost Izetbegovićevih poruka i njihov značaj za savremeno društvo. Program promocije je upotpunjen izložbom fotografija posvećenih ratnim posjetama predsjednika Izetbegovića Gračanici. *Izvor: Organizatori / Grad Gračanica.*

23. 8. 2025.

***Kolektivna izložba gračaničkih
slikara u Osman-kapetanovoj
medresi***

Na terasi Osman-kapetanove medrese u centru Gračanice otvorena je kolektivna izložba gračaničkih slikara u okviru manifestacije "Ljetne večeri pod lipama". Izložbu su organizovali JU BKC Gračanica i Gradska uprava, a okupila je lokalne autore različitih generacija. Predstavljena su djela inspirisana motivima zavičaja, svakodnevnog života i kulturnog naslijeđa. Izložba je privukla veliki broj posjetilaca, a kritika je ocijenila da gračanički likovni krug pokazuje izuzetnu vitalnost i raznolikost izraza, od realističnog pejzaža do apstraktne forme. *Izvor: Radio Gračanica.*

28. 8. 2025.

***Održana 10. sjednica Gradskog
vijeća Gračanica: izvještaj o
izvršenju budžeta, stipendije,
javne ustanove i imenovanja***

Pored usvojenih budžetskih dokumenata, na sjednici su donesene i nove odluke o stipendiranju učenika i studenata za školsku 2025/2026. godinu, kao i o prodaji i statusnim promjenama nekretnina u vlasništvu Grada. Vijeće je potvrdilo imenovanja članova nadzornih i upravnih odbora u nekoliko javnih preduzeća i ustanova – među njima "Komus", "Vodovod i kanalizacija", "Veterinarska stanica", "Gradska

apoteka" i "Dom zdravlja". Također su izvršene personalne promjene u komisijama Gradskog vijeća te usvojeni statuti šest mjesnih zajednica – Gračanica, Soko, Škahovica, Pribava, Miričina i Gornji Doborovci. U nastavku rada vijećnici su razmotrili Izvještaj o radu Gradskog vijeća i radnih tijela za prvo polugodište, te Informaciju o aktuelnim privrednim kretanjima na području Grada Gračanica, kao i Informaciju o pripremama zimske službe. Sjednica je protekla u konstruktivnoj raspravi i usvajanju većine tačaka dnevnog reda, čime su potvrđene programske aktivnosti lokalne uprave u prvoj polovini 2025. godine. *Izvor: Grad Gračanica*

1. 9. 2025.

Obilježen Dan 111. / 221.

gračaničke brigade Armije RBiH

Program obilježavanja počeo je polaganjem cvijeća na Centralno spomen-obilježje poginulim borcima i učenjem Fatihe, uz prisustvo ratnih komandanata, pripadnika brigade, porodica šehida i građana. Potom je u Bosanskom kulturnom centru održana svečana akademija. Prisutnima su se obratili gradonačelnik Gračanice Sadmir Džebo, koji je podsjetio na herojsku ulogu gračaničke brigade i profesor Bilal Begović, pomoćnik komandanta brigade za moral, koji je održao prigodan čas historije, naglasivši da je Brigada tokom agresije na BiH dala ogroman

doprinos odbrani Gračanice i drugih ugroženih naselja širom zemlje. Kulturno-umjetnički program upotrijebili su članovi KUD-a "Adem Alić" i učenici Muzičke škole Gračanica.

Izvor: Radio Gračanica

2. 9. 2025.

Počela nastava fizičkog odgoja za učenike gračaničkih srednjih škola u novoj sportskoj dvorani "Bazen"

Nakon što je tokom ljeta završeno potpuno opremanje i tehnički prijem, srednjoškolci Gračanice započeli su novu školsku godinu uz izvođenje nastave fizičkog odgoja u modernoj sportskoj dvorani "Bazen". Riječ je o objektu na koji se nakon "kamena temeljca" čekalo skoro dvije decenije. Dvorana je opremljena savremenim sportskim rekvizitima, svlačionicama, sanitarnim čvorovima i prostorom za gledaoce, a omogućava izvođenje nastave tjelesnog i zdravstvenog odgoja u optimalnim uslovima. Direktori škola izrazili su zadovoljstvo što učenici imaju priliku koristiti savremene sadržaje, a Grad Gračanica najavio je ulaganja u školski sport i zdravlje mladih. *Izvor: Škole / GU Gračanica.*

10. 9. 2025.

Održana 14. izložba stočarstva i ruralnog stvaralaštva Gračanica – Doboj Istok 2025

Izložba je održana na prostoru Sajmišta u u Stjepan Polju kao zajednički projekat Grada Gračanice i Općine Doboj Istok. Okupila je više od stotinu izlagača – stočara, poljoprivrednih proizvođača, pčelara, udruženja žena i umjetnika iz obje lokalne zajednice. Izložbu su svečano otvorili gradonačelnik Gračanice Sadmir Džebo, načelnik Doboja Istoka Kemal Bratić i ministar poljoprivrede TK Fedahija Ahmetović, uz prisustvo predstavnika zadruge "Gračanka", mjesne zajednice Stjepan Polje i Udruženja proizvođača mlijeka TK. Pored izložbe rasnih grla i poljoprivrednih proizvoda, održane su i radionice o unapređenju stočarstva, prikaz tradicionalne pripreme pekmeza, te degustacije mliječnih i pčelinjih proizvoda. Učestvovalo je i trinaest udruženja žena s područja Gračanice i dva iz Kotorska, a bogat program upotpunili su nastupi kulturno-umjetničkih društava. U sklopu izložbe održana je i četvrta "Sirijada", tradicionalno takmičenje u pripremi domaćeg suhog sira. Prvo mjesto osvojile su žene iz OKC "Bosna Art" iz Stjepan Polja, drugo UŽ "Dukat" iz Malešića, a treće UŽ "Mirićanke" iz Miričine. Posebnu pažnju privukao je rekordni sir mljekare TFS Duje, težak 26,5 kg, prečnika 45 cm i visine 15 cm, što je novi

rekord Gračanice i Doboja Istoka. Organizatori manifestacije bili su ZZ "Gračanka", Grad Gračanica i Općina Doboj Istok, uz podršku Turističke zajednice Gračanice, Udruženja proizvođača mlijeka TK i OKC "Bosna Art" Stjepan Polje. Izložba stočarstva i "Sirijada" još jednom su potvrdile vitalnost gračaničkog i dobojskoistočkog sela, spoj tradicije i savremene proizvodnje, te važnost zajedničkih manifestacija koje povezuju grad i selo. *Izvor: Službeni portal Grada Gračanica*

12. 9. 2025

"Gračanke i građani Gračanice za Palestinu"

Velika grupa mladih, kojima su se pridružili i stariji sugrađani, izveli su protestnu šetnju čaršijom u znak podrške Palestini i podizanja svijesti o genocidu koji se dešava pred očima svijeta. Na tri mjesta u centralnoj ulici bili su postavljeni stolovi organizacije MFS EMMAUS s kutijama za dobrovoljne priloge, a prikupljena sredstva bit će objedinjena pod nazivom "Gračanke i građani Gračanice za Palestinu". Simbolično, udruženje "Gračaničko keranje" je po uzoru na cvijet Sjećanja posvećen žrtvama genocida nad Bošnjacima, izradilo cvijet za Palestinu s jednako snažnom porukom. Više tih cvjetova koji simboliziraju žrtve Palestine podijeljen je i tokom samo šetnje.

14. 9. 2025

U organizaciji Udruženja traktorista "Vis" Babići (Gračanica) održana 9. tradicionalna traktorijada

Na turističkom izletištu Vis (Babići kod Gračanice) okupilo se oko 250 traktorista (što je rekord), koji su stigli iz Srebrenika, Tešnja, Trebave, Srbca, Doboja, Zavidovića, Lukavca, Prnjavora, Modriče i mnogih drugih mjesta. Predsjednik MZ Babići – Avdo Bajraktarević i predsjednik Udruženja traktorista Vis Babići – Nusret Mustafić pokazali su se kao veoma dobri domaćini i organizatori. Ovaj dan, bio je prilika da traktoristi, ljudi koji se inače bave poljoprivredom i šumarstvom, odmore sebe i svoje mašine. Naročito, nakon jedne veoma teške sušne godine za pomenute poslove. Program je obogaćen tradicionalnim igrama koje krase traktorijade gdje god da se organizuju, a to je vuča konopca i vuča klade. Traktor, kao jedna od najvažnijih poljoprivrednih mašina, igra ključnu ulogu u savremenoj poljoprivredi, posebno u velikoj proizvodnji. *Izvor: Radio Gračanica.*

23. 9. 2025.

Gračanica dobitnik priznanja za najorganizovaniju saradnju s mjesnim zajednicama u BiH

Grad Gračanica proglašen je jednom od najorganizovanijih jedinica lokalne samouprave u oblasti saradnje s mjesnim zajednicama u Bosni i Hercegovini.

Priznanje je dodijeljeno na završnoj manifestaciji Festivala mjesnih zajednica u Sarajevu, koji je održan u okviru projekta "Jačanje uloge mjesnih zajednica u BiH". Projekat se odvijao u dvije faze i obuhvatio 41 općinu i 199 mjesnih zajednica. Gračanica je dobila priznanje za najbolju koordinaciju i zajedničko planiranje projekata s mjesnim zajednicama. U okviru projekta, 11 gračaničkih MZ ostvarilo je direktne koristi kroz realizaciju oko 30 projekata ukupne vrijednosti 872.203 KM, uz podršku Švedske i UNDP-a. Gradonačelnik Sadmir Džebo izjavio je da je ovo priznanje potvrda višegodišnjeg rada na jačanju lokalne samouprave i partnerstva s građanima. *Izvor: Službeni portal Grada Gračanica / UNDP BiH.*

26. 9. 2025.

U Gračanici održan Drugi međunarodni festival keranja i čipkarstva



U prostoru starog kina pored Sahat-kule otvoren je i održan Drugi međunarodni festival keranja i čipkarstva, u organizaciji Udruženja "Gračaničko keranje", uz podršku Gradske uprave

i JU BKC Gračanica. Festival je okupio 18 izlagača iz 12 različitih zemalja svijeta: Belgije, Poljske, Hrvatske, Slovenije, Mađarske, Španije, Italije, Turske, Paname i Portorika, koji su predstavili svoje tehnike, motive i rukotvorine. Festival je trajao tri dana, a popunjen je različitim sadržajima. Posjetiocima su imali priliku da vide bogat program izložbi, radionica i kulturnih sadržaja. Na otvaranju su govorile Azemina Ahmedbegović, predsjednica Udruženja, te članice Mejra Gopo i Munira Vehabović. Festival je zvanično otvorio gradonačelnik Sadmir Džebo, istakavši da "keranje i čipkarstvo nisu samo zanat, već umjetnost koja povezuje kulture i generacije". Svi prisutni isticali su značaj ovog festivala za očuvanje kulturne baštine, ali i potvrdili dugogodišnjeg rada i umijeća gračaničkih žena. "Ovo je još jedna potvrda gračaničkim ženama, koje su širom svijeta prepoznate po cvijetu Sjećanja za Srebrenicu, ali i rezultat njihovog istrajnog i uspješnog rada na njegovanju tradicije," poručeno je sa ovog okupljanja. U okviru pratećeg programa održana je i radionica za učenike osnovnih škola te večernja modna revija ručno rađenih predmeta od čipke. Organizovana je i panel diskusija na temu "Njegovanje i očuvanje kulturne baštine na području Gračanice i BiH", na kojem je između ostalih govorila i Svetlana Bajić, kao jedan od naših najboljih stručnjaka iz oblasti etnologije i tra-

diconalnog ženskog ručnog rada
Izvor: Udruženje "Gračaničko keranje" / GU Gračanica.

26. 9. 2025.

Osmi sajam ženskog poduzetništva "Zlatne ruke Gračanice"

Paralelno sa Drugim međunarodnim festivalom keranja i čipkarstva, skoro na istoj lokaciji u Gračanici održan je i osmi po redu sajam ženskog poduzetništva "Zlatne ruke Gračanice", koji je i ove godine okupio brojne izlagačice iz cijele Bosne i Hercegovine. Na sajmu su predstavljani razni proizvodi kućne radinosti, čiji su kreatori žene. I ovogodišnji sajam je potvrdio da su ovakve manifestacije izuzetno važne za promociju ženskog stvaralaštva, kreativnosti i ekonomskog osnaživanja. Osim gradskih zvaničnika, prisutnima se obratila i predstavnik udruženja žena sa područja Grada Hava Bešić, koja je zahvalila Gradu Gračanica na kontinuiranoj podršci i naglasila važnost afirmacije žena poduzetnica
Izvor: Radio Gračanica / GU Gračanica.

29. septembar 2025.

Održana 11. sjednica Gradskog vijeća Gračanice: više odluka i informacija iz oblasti prostornog uređenja, infrastrukture i lokalnog razvoja.

Vijeće je usvojilo Odluku o zasnivanju prava plodouživanja na nekretninama u vlasništvu Grada, čime su stvorene pretpostavke za efikasnije upravljanje gradskom imovinom. Donesene su i odluke o davanju saglasnosti na statute mjesnih zajednica Rašljeva, Babići i Doborovci, čime je nastavljen proces normativnog usklađivanja i jačanja mjesne samouprave. Usvojen je i Izvještaj o realizaciji Strategije razvoja Grada Gračanica za 2024. godinu, koji pokazuje napredak u infrastrukturnim i privrednim projektima te nastavak ulaganja u održivi lokalni razvoj. Vijećnici su razmatrali informacije o stanju javne rasvjete i o zimskoj službi, kao i izvještaj o realizaciji kapitalnog projekta "Poboljšanje sistema vodosnabdijevanja i proširenje kanalizacione mreže", koji se provodi na širem gradskom području. Sjednica je protekla u konstruktivnom tonu, uz naglašenu potrebu da se i u narednom periodu fokus zadrži na razvoju infrastrukture, unapređenju javnih usluga i ravnomjernom razvoju svih mjesnih zajednica. *Izvor: Grad Gračanica*

2. 10. 2025.

U Gračanici "Crvena jabuka" umjesto "Fortune"



Na mjestu nekadašnje fabrike modne obuće "Fortuna", koja je decenijama bila simbol gračaničke industrije i prepoznatljiva po svojoj modnoj cipeli na sajmovima i revijama širom bivše Jugoslavije, otvoren je "Crvena jabuka market" – savremeni trgovački centar površine preko 1.700 kvadratnih metara. Time je prostor koji je nakon propasti "Fortune" u tranzicijskim i mutnim privatizacionim previranjima godinama bio zapušten, dobio novu ekonomsku funkciju i simbolično značenje. Tako za mnoge starije građane Gračanice otvaranje ovog objekta, pored komercijalne vrijednosti, ima i neku sentimentalnu notu – jer vraća život na lokaciju koja je nekada zapošljavala u kontinuitetu više od hiljadu radnika i bila ponos lokalne privrede. Market je, inače, dio lanca "Crvena jabuka market", koji posluje u sastavu kompanije "Tropic Maloprodaja", a otvorenjem nove poslovnice zaposleno je 78 radnika. Ponuda marketa obuhvata svježe odjele mesa,

ribe, voća i povrća, pekaru i poslastičarnicu vlastite proizvodnje, kao i odjel gotovih jela i salata. Poseban segment čine “reFresh coffee & juice bar”, odjel zdrave prehrane i sushi zona, a dostupni su i proizvodi robne marke “Volim”. Prema riječima Aleksandre Marković, PR menadžerice kompanije, cilj je približiti kupcima koncept savremene prehrane s naglaskom na svježe i domaće namirnice, te omogućiti kvalitetnije iskustvo kupovine. Na dan otvaranja pripremljene su posebne akcije, poklon-bonovi i popusti, a kupcima penzionerima biće omogućen trajni popust od 10% svakog ponedjeljka. Otvaranjem “Crvene jabuke” u Gračanici dodatno se učvršćuje prisustvo ovog trgovačkog lanca na sjeveroistoku Bosne i Hercegovine, dok je lokalna zajednica dobila još jedan moderan prodajni centar koji spaja ekonomsku revitalizaciju prostora i sjećanje na industrijsku tradiciju. Uskoro se očekuje i otvaranje proširenog poslovnog centra “Bingo” i prodajnog centra “Lidl” – sve na lokaciji Industrijske zone. Tako Gračanica poprima konture razvijenog trgovačkog središta u ovom dijelu Bosne.

Izvor: Klix.ba

3. 10. 2025.

Otvoren hajrat “Brkića vakuf” u Stjepan Polju



Radi se o višenamjenskom ekonomskom objektu, u centru Stjepan Polju, koji će, nakon još nekih sitnijih formalnosti biti i formalno predat Islamskoj zajednici kao fakuf uglednog privrednika iz tog sela Haži Vahida Brkića, njegove supruge Elvire, kćerke Delile i sina Ibrahima. U objektu u koji je, prema objavljenim podacima uloženo oko 1.300,000 KM planirano aktiviranje više sadržaja, koji će donositi prihode, kako je rečeno, “za osnaživanje” sve tri džemata s područja Stjepan Polja i Medžlisa Islamske zajednice Gračanica. Presjecanjem vrpce, na prigodnoj svečanosti, uz prisustvo brojnih građana i političkih funkcionera Gračanice i TK, objekat su simbolično otvorili hadži Vahid Brkić i članovi njegove porodice, izrazivši svoje zadovoljstvo što se njihova ideja “omladila” i “što je Stjepan Polje dobilo objekat u kome će svoje mjesto naći mališani Područnog odjeljenja “Boje djetinjstva” (...) u sastavu Dječijeg obdaništa “Naša djeca” iz Gračanice. U ovom odjeljenju, za po-

četak, naći će se 45 dječaka i djevojčica iz Stjepan Polja. Sa dobijanjem upotrebne dozvole, otvaranjem obdaništa, nešto ranije i čevabdžinice, a u narednim danima i marketa i sale za sastanke – želja vakifa iz porodice Brkić je ostvarena. Svojom arhitekturom zgrada od oko 700 kvadratnih metara prostora skladno se uklopila u centar sela i sa svojim sadržajima bit će samoodrživa. Prihodima koji se budu u njoj ostvarivali, kako rekoše vakifi, jačat ćemo naše džemate i funkcionisanje džamija. (napomena: uručivanjem vakufname porodici Brkić, koju je obavio *uručio Reisul-ulema Islamske zajednice u Bosni i Hercegovini dr. Husejn ef. Kavazović, 20. 10. 2025.*, objekat je upisan kao vakuf pod okriljem Islamske zajednice Gračanica. (Izvor: Hasan Čalić, *Dnevni avaz* 7. 10. 2025., str. 6.)

7. 10. 2024.

Mega-roll d.o.o Miričina (Gračanica): 40 radnika i njihove djece na odmoru u Turskoj o trošku kompanije

Time je ova firma, poznata po kvalitetnoj proizvodnji i ugradnji PVC stolarije, ponovo dokazala da se poslovni uspjeh ne mjeri samo poslovnim rezultatima, već i načinom na koji se odnosi prema ljudima koji ga grade – svojim radnicima. Nakon nezaboravnog putovanja u Istanbul 2022. godine, vlasnici firme, Samir i Alma Saletović, odlučili su i ove godine nagraditi svoje uposlenike.

Ovog puta radi se o velikoj kružnoj turi kroz Tursku o trošku firme koja obuhvata Bursu, Ankaru, Kapadokiju i Istanbul – destinacije koje svjedoče o bogatoj historiji, kulturi i ljepotama ove zemlje. Radnici su imali priliku da se opuste, druže i zajedno istražuju znamenitosti, dok će im, kako je potvrđeno, za vrijeme provedeno na ovom putovanju biti isplaćena puna plata. “Ovo nije samo nagrada, ovo je dokaz da radimo u firmi koja nas poštuje i cijeni”, poručili su uposlenici MEGA-ROLL-a, koji su puni dojmova podijelili svoje fotografije i zahvalili gazdama na ovom nesvakidašnjem potezu. Samir i Alma Saletović još jednom su pokazali da su pravi primjer kako se gradi uspješno i humano poslovanje – ono u kojem su ljudi na prvom mjestu. Izvor: <https://mahalla.ba/2025/10/05/kompanija-iz-gracanice-odvela-40-radnika-i-njihovu-djecu-u-tursku-na-odmor/>

17. 10. 2025.

Selo u srcu grada – Sajam posvećen ženama sa sela

U povodu *Međunarodnog dana žena na selu*, na korzou uz gradski park održan je sajam pod nazivom “Selo u srcu grada”, u organizaciji Udruženja žena “Tragom tradicije” i uz podršku MFS EMMAUS-a Doboj Istok. Sajam je okupio brojne izlagačice iz gračaničkih i okolnih sela koje su predstavile tradicionalne proizvode, ručne radove i domaće specijalitete. Cilj manifestacije bio je ukazati na važ-

nost žena u očuvanju seoske tradicije, porodične ekonomije i ruralnog života. Tokom dana održani su prigodni programi – svečano otvaranje i dodjela zahvalnica, prezentacija rada MFS EMMAUS-a, zajednički ručak i takmičenje u pripremi tradicionalne tufahije, koje je izazvalo posebno interesovanje posjetilaca. Manifestacija je završena proglašenjem pobjednika i zatvaranjem sajma u večernjim satima. U vedrom i domaćinskom duhu, događaj je još jednom potvrdio da selo – i u srcu grada – ostaje važan dio identiteta Gračanice. *Izvor: Portal Grada Gračanica*

17. 10. 2025.

Održani drugi “Gračanički dani meda” u organizaciji Udruženja pčelara “Bagremovac”.

Manifestacija je okupila lokalne pčelare i proizvođače meda s ciljem promocije pčelarstva, pčelinjih proizvoda i očuvanja pčele kao važnog dijela prirode i tradicije. Na štandovima duž korza predstavljeni su različiti vrhunski domaći medovi, propolis, matična mliječ, vosak i prirodna kozmetika na bazi pčelinjih proizvoda, a posjetiocima su imali priliku kušati i kupiti proizvode direktno od proizvođača. Dani meda postaju prepoznatljiv dio jesenskih događanja u gradu, a svojim prisustvom sve više povezuju proizvođače, građane i edukativne inicijative o značaju pčele za ekosistem. Skladno

s duhom manifestacije “Selo u srcu grada”, i ovaj sajam je pokazao kako ruralni sektor i gradski život mogu uspješno djelovati u istom ritmu – kroz zajedništvo, domaću proizvodnju i poštovanje prirode. *Izvor: Portal Grada Gračanica.*

26. 10 2025.

Umro Husnija Imamović – veliki humanista i dugogodišnji sekretar Crvenog krsta u Gračanici

Njegova familija porijeklom je iz istočne Bosne, konkretnije iz sela Čajnjevo u blizini Čajniča. Tamo je i rođen, 1954 godine, proveo rano djetinjstvo i završio osnovnu školu. Po završetku škole našao se s porodicom u Gračanici, gdje je završio Školu učenika u privredi – krojački smjer. Kao KV krojač odmah je dobio posao u tadašnjoj Tvornici konfekcije “Alija Hodžić”, kasnijem “Olimpu”. U proizvodnji je pokazivao izuzetnu radnu disciplinu i želju za napredovanjem. Tako se uz redovan posao osposobio za kvalifikovanog vozača i instruktora svih kategorija, a potom je završio i Srednju saobraćajnu školu. U Gračanici je zasnovao porodicu i trajno se vezao za ovaj grad. Život ga, međutim, nije štedio: doživio je tešku porodičnu tragediju kada mu je jedno od troje djece poginulo u saobraćajnoj nesreći. Ta je tragedija obilježila čitav njegov život, ali nikada nije dozvolio da ga slomi. Tu je bol nosio tiho i dostojanstveno, pretvarajući

je u dodatni motiv da pomogne drugima. Isticao se još tokom školovanja u Saveza socijalističke omladine i drugih društvenih organizacija koje su okupljale mlade. Svojim radom posebno se afirmisao u podmlatku Crvenog krsta. Zahvaljujući tome, 1978. godine imenovan je za sekretara Crvenog krsta Gračanica, na kojoj je dužnosti ostao više od 44 godina, sve do penzionisanja 2022. godine. Vremenom je postao sinonim za humanost i požrtvovanost. Posebno se istakao tokom rata 1992–1995. godine, kada je u okviru Crvenog krsta i struktura civilne zaštite učestvovao u zbrinjavanju ranjenih, bolesnih, izbjeglih i siromašnih. U najtežim okolnostima bio je most između onih koji su mogli pomoći i onih kojima je pomoć bila prijeko potrebna – tih, skroman, uvijek dostupan. Kasnije, u vrijeme velikih poplava 2014. godine i pandemije koronavirusa, ponovo je bio na prvoj liniji pomoći. Gdje god je bilo potrebe i nevolje – Husnija je bio tamo. Organizovao je i brojne akcije dobrovoljnog darivanja krvi, u kojima je i sam učestvovao – krv je darivao 66 puta, što je činilo dio njegovog životnog uvjerenja da humanost mora biti primjer, a ne izuzetak. Za dugogodišnji predani rad više je puta nagrađivan i pohvaljivan, a dobitnik je i općinskog priznanja – Srebrene značke. Uz humanitarni rad, nalazio je vremena i za druge društveno korisne aktivnosti. Bio je jedan od osnivača i dugogodišnji

predsjednik Tamburaškog orkestra Gračanica, svirao tamburicu i okupljao ljude oko muzike i prijateljstva. Bio je i član Planinarskog društva, Lovачkog društva i Udruženja pčelara. Poznat po vedrini, duhovitosti i neiscrpnjoj energiji, unosio je optimizam u svaku sredinu u kojoj se pojavio. Pamtiće se kao čovjek koji je gotovo čitav svoj život posvetio pomaganju drugima – osobito starima, bolesnima i iznemoglim – vjerujući da je najveći čin čovječnosti pomoći čovjeku u nevolji. Njegov dugogodišnji saradnik i prijatelj Ibrahim Nurkić oprostio se od njega u ime Crvenog krsta riječima: “Dragi jarane, istinski družo moj, nek ti je rahmet i lahka zemlja bosanska.” Ukopan je 27. oktobra 2025. godine na mjesnom groblju Ritašići u Gračanici.

30. 10. 2025.

Gradski projekti: u toku asfaltiranja i radovi na više lokacija

Na nekoliko lokacija u užem i prigradskom području Gračanice u toku su radovi na sanaciji putne infrastrukture. Prema navodima Radio Gračanice, aktivnosti se odvijaju u MZ Džakule, Miričina i Soko, gdje se postavljaju nove asfaltne podloge i prilazni putevi kao rezultat zajedničkog finansiranja Grada i građana. Radovi su dio jesenskog plana odobrenog na sjednici GV-a u septembru, a cilj je osigurati prohodnost puteva u zimskom periodu.

31. 10. 2025.

Održana 12. sjednica Gradskih vijeća Gračanica: prva projekcija Budžeta za 2026. godinu iznosi 25.017.000 KM.

Kako je istakao gradonačelnik Sadmir Džebo, Nacrt Budžeta je rađen dosta oprezno i realno, što ne znači da nakon obavljene javne rasprave neće doći do izvjesnih korekcija. Usvojen je i Izvještaj o izvršenju Budžeta za prvih devet mjeseci 2025. godine, prema kojem su ostvareni prihodi od 19,7 miliona KM, uz preneseni višak od 3,2 miliona. Oba dokumenta usvojena su jednoglasno. Date su i saglasnosti na statute četiri mjesne zajednice – Gornja Orahovica, Donja Lohinja, Lukavica i Prijeko Brdo. U izvještajnom dijelu dnevnog reda posebno se ističe Informacija o stanju putne infrastrukture, u kojoj je istaknuta potreba hitne sanacije lokalnih i makadamskih puteva te postavljanja saobraćajne signalizacije u svim mjesnim zajednicama. Naglašeno je da su urađeni projekti horizontalne i vertikalne signalizacije i da će se u narednoj godini izdvojiti dodatna sredstva za njihovu realizaciju. *Izvor: Gradsko vijeće Gračanica*

1. 11. 2025.

Medžlis Islamske zajednice Gračanica: tribina (naučni skup) o životu i djelu Hasan ef. Kadića i Ibrahim ef. Mehinagića (Tezkiretnama)

Nastavljajući aktivnosti upoznavanja javnosti i džematlija sa poznatim ličnostima iz vjerskog i društvenog života u bližoj i daljoj prošlosti koje su pokrenute prije nekoliko godina i vode se na nivou Islamske zajednice Bosne i Hercegovine pod simboličnim nazivom Tezkiretnama, Medžlis Islamske zajednice Gračanica, po programu za ovu godinu, organizovao je Naučni skup (tribinu) u Dershani Osmank-kapetanove medrese na kojem se govorilo o liku i djelu dvojice gračaničkih alima: Ibrahim ef. Mehinagiću i Hasan ef. Kadiću, koj su obilježili društveni i duhovni život Gračanice u periodu između dva svjetska rata. O do sada manje poznatom Hasan ef. Kadiću vrlo uspješno predavanje održao je historičar Edin Šaković i iznio niz detalja do kojih je došao u svom istraživanju, ne samo o Hasan ef., već i o alimskoj porodici Kadića, koja vuče porijeklo iz Vranovića kod Gračanice. Lik i djelo Ibrahim ef. Mehinagića, šerijatskog sudije i dugogodišnjeg predsjednika Vakufsko-mearifskog povjerenstva u Gračanici, autora mnogih tekstova društvenog i vjerskog karaktera, koji je ostavio duboke tragove u vjerskom životu ne samo Gračanice, već i Islamske zajednice

Bosne i Hercegovine, predstavila je profesorica islamske teologije iz Gračanice Almasa Šestan, koja je odbranila i magistarski rad na temu o Mehinagiću. Inače, o ovoj značajnoj ličnosti svoje radove objavili su u "Gračaničkom glasniku", rahm. Kemal Bašić (*Pisana riječ Ibrahim ef.*

Mehinagića iz Gračanice. Gračanički glasnik, X/19, 2005., 75-83) i Edin Šaković (*Hafiz Ibrahim ef. Mehinagić – prilog životopisu*, Gračanički glasnik, XVI/32, 2011., 22 – 60), koji je ovim povodom priredio i izložbu o Ibrahim ef. Mehinagiću u holu BKC u Gračanici.

